

【曹操】

## 01

薤露行

惟汉二十世，所任诚不良。

沐猴而冠带，知小而谋强。

犹豫不敢断，因狩执君王。

白虹为贯日，已亦先受殃。

贼臣持国柄，杀主灭宇京。

荡覆帝基业，宗庙以燔丧。

播越西迁移，号泣而且行。

瞻彼洛城郭，微子为哀伤。

## 02

蒿里行

关东有义士，兴兵讨群凶。

初期会孟津，乃心在咸阳。

军合力不齐，踳躅而雁行。

势利使人争，嗣还自相戕。

淮南弟称号，刻玺于北方。

铠甲生虮虱，万姓以死亡。

白骨露于野，千里无鸡鸣。

生民百遗一，念之断人肠。

## 03

### 苦寒行

北上太行山，艰哉何巍巍。

羊肠坂诘屈，车轮为之摧。

树木何萧瑟，北风声正悲。

熊羆对我蹲，虎豹夹路蹄。

溪谷少人民，雪落何霏霏。

延颈长叹息，远行多所怀。

我心何怫郁，思欲一东归。

水深桥梁绝，中路正徘徊。

迷惑失故路，薄暮无宿栖。  
行行日已远，人马同时饥。  
担囊行取薪，斧冰持作糜。  
悲彼东山诗，悠悠使我哀。

## 04

### 却东西门行

鸿雁出塞北，乃在无人乡。  
举翅万里馀，行止自成行。  
冬节食南稻，春日复北翔。  
田中有转蓬，随风远飘扬。  
长与故根绝，万岁不相当。  
奈何此征夫，安得驱四方。  
戎马不解鞍，铠甲不离傍。  
冉冉老将至，何时返故乡。  
神龙藏深泉，猛兽步高冈。  
狐死归首丘，故乡安可忘。

【曹丕】

05

燕歌行二首(其一)

秋风萧瑟天气凉。草木摇落露为霜。

群燕辞归雁南翔。念君客游思断肠。

慊慊思归恋故乡。君何淹留寄他方。

贱妾茕茕守空房。忧来思君不敢忘。

不觉泪下沾衣裳。援琴鸣弦发清商。

短歌微吟不能长。明月皎皎照我床。

星汉西流夜未央。牵牛织女遥相望。

尔独何辜限河梁。

06

秋胡行

朝与佳人期。日夕殊不来。

嘉肴不尝。旨酒停杯。

寄言飞鸟。告余不能。

俯折兰英。仰结桂枝。

佳人不在。结之何为。

从尔何所之。乃在大海隅。

灵若道言。贻尔明珠。

企予望之。步立踟蹰。

佳人不来。何得斯须。

【曹植】

07

吁嗟篇

吁嗟此转蓬，居世何独然。

长去本根逝，宿夜无休闲。

东西经七陌，南北越九阡。

卒遇回风起，吹我入云间。  
自谓终天路，忽然下沉渊。  
惊飙接我出，故归彼中田。  
当南而更北，谓东而反西。  
宕宕当何依，忽亡而复存。  
飘飘周八泽，连翩历五山。  
流转无恒处，谁知吾苦艰。  
愿为中林草，秋随野火燔。  
糜灭岂不痛，愿与根荄连。

## 08

### 野田黄雀行

高树多悲风，海水扬其波。  
利剑不在掌，结友何须多。  
不见篱间雀，见鹞自投罗。  
罗家得雀喜，少年见雀悲。  
拔剑捎罗网，黄雀得飞飞。

飞飞摩苍天，来下谢少年。